



SLUŽBENE NOVINE

KANTONA SARAJEVO

Godina XXIX - Broj 17

Petak, 3. 5. 2024. godine
SARAJEVO

ISSN 1512-7052

KANTON SARAJEVO

Skupština Kantona Sarajevo

Na osnovu člana 12. stav (1) tačka c) i člana 18. stav (1) tačka b) Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01, 28/04, 6/13 i 31/17), Skupština Kantona Sarajevo, na 15. radnoj sjednici održanoj dana 26.04.2024. godine, donijela je

ZAKON

O PRIVREMENOM PREUZIMANJU SUFINANSIRANJA INSTITUCIJA KULTURE I OBRAZOVANJA ČIJI JE OSNIVAČ BOSNA I HERCEGOVINA

DIO PRVI - OSNOVNE ODREDBE

Član 1. (Predmet)

Ovim zakonom uređuje se privremeno sufinansiranje institucija kulture i obrazovanja čiji je osnivač Bosna i Hercegovina (u daljem tekstu: institucije), javni interes Kantona Sarajevo za njihovo sufinansiranje, planiranje rada i finansijskog poslovanja, te izvještavanje o radu, poslovanju i utrošku dodjeljenih finansijskih sredstava.

Član 2. (Institucije)

- Ovaj zakon će se privremeno primjenjivati na sljedeće institucije kulture i obrazovanja čiji je osnivač Bosna i Hercegovina:
 - Zemaljski muzej Bosne i Hercegovine,
 - Nacionalna i univerzitetska biblioteka Bosne i Hercegovine,
 - Historijski muzej Bosne i Hercegovine,
 - Muzej književnosti i pozorišne umjetnosti Bosne i Hercegovine,
 - Kinoteka Bosne i Hercegovine,
 - Umjetnička galerija Bosne i Hercegovine,
 - Biblioteka za slijepa i slabovidna lica u Bosni i Hercegovini.
- Ovaj zakon će se privremeno primjenjivati na institucije iz stava (1) ovog člana sve do trenutka kada Bosna i Hercegovina, kao osnivač institucija iz stava (1) ovog

člana, počne izvršavati prava i obaveze osnivača nad institucijama iz stava (1) ovog člana.

Član 3.

(Javni interes Kantona Sarajevo za sufinansiranje)

Ovim zakonom utvrđuje se postojanje javnog interesa Kantona Sarajevo za privremeno sufinansiranje institucija iz člana 2. ovog zakona, i to:

- pravo građana Kantona Sarajevo na pristup uslugama institucija u okviru njihovih registrovanih djelatnosti,
- prava i obaveza institucija da izvršavaju poslove iz okvira njihove registrovane djelatnosti koje su od opšteg/javnog društvenog interesa uređene posebnim zakonima iz oblasti kulture,
- prava zaposlenika na rad i dohodak za obavljanje rada i poslova iz registrovane djelatnosti ovih institucija,
- zaštita objekata u kojima su smještene ove institucije od daljeg propadanja, a posebno onih koji su na listi proglašanih nacionalnih spomenika.

Član 4. (Načela)

Načela privremenog preuzimanja sufinansiranja institucija kulture i obrazovanja čiji je osnivač Bosna i Hercegovina su:

- Zakonitost - prava i obaveze institucija da obavljaju poslove u okviru registrovane djelatnosti na način kako je to propisano zakonom.
- Odgovornost - podrazumjeva odgovornost Kantona Sarajevo za održivost institucija iz člana 2. stav (1) ovog zakona, ali i prema građanima kako bi imali nesmetan pristup institucijama te prema korištenju javnih sredstava;
- Javnost i transparentnost organa Kantona Sarajevo u procesu održivosti rada institucija, finansiranja, monitoringa i izvještavanja o utrošku budžetskih sredstava.

DIO DRUGI – SUFINANSIRANJE INSTITUCIJA

Član 5.

(Sufinansiranje institucija)

- (1) Kanton Sarajevo će putem resora Ministarstva za nauku, visoko obrazovanje i mlade Kantona Sarajevo sufinansirati rad Nacionalne i univerzitetske biblioteke Bosne i Hercegovine, odnosno putem Rektorata Univerziteta u Sarajevu Zemaljski muzej Bosne i Hercegovine.
- (2) Kanton Sarajevo će putem Ministarstva kulture i sporta Kantona Sarajevo sufinansirati institucije iz člana 2. tač. c) do g) ovog zakona.
- (3) Kanton Sarajevo će privremeno do ispunjenja uslova iz člana 2. stav (2) ovog zakona sufinansirati institucije iz člana 2. stav (1) ovog zakona, sredstvima namjenjenim za:
 - a) plaće, topli obrok, regres i druge naknade,
 - b) režijske troškove institucija.

Član 6.

(Izvjestavanje i planiranje rada)

- (1) Institucije su obavezne podnositi redovne godišnje izvještaje o radu i finansijskom poslovanju za proteklu godinu putem resornog ministarstva Vladi i Skupštini Kantona Sarajevo za finansijska sredstva iz člana 5. stav (3) ovog zakona, a na njihov zahtjev i periodične izvještaje za ta sredstva.
- (2) Institucije su obavezne dostavljati redovne godišnje planove i programe rada sa finansijskim planovima za tekuću godinu kojim se planira angažiranje finansijskih sredstava iz člana 5. stav (3) ovog zakona putem resornog ministarstva Vladi i Skupštini Kantona Sarajevo.
- (3) Godišnji programi rada sa finansijskim planovima i godišnji izvještaji o radu sa finansijskim izvještajima će se podnositi na način koji će se regulisati posebnim ugovorom o sufinansiranju institucije.

DIO TREĆI - ZAVRŠNE ODREDBE

Član 7.

(Nadzor nad primjenom)

Nadzor nad primjenom ovog zakona će vršiti Ministarstvo za nauku, visoko obrazovanje i mlade Kantona Sarajevo, Ministarstvo kulture i sporta Kantona Sarajevo i Ministarstvo finansija Kantona Sarajevo, svako u granicama svojih nadležnosti.

Član 8.

(Primjena drugih zakona)

Na institucije iz člana 2. stav (1) ovog zakona, a u skladu sa ovim zakonom, odgovarajuće će se primjenjivati odredbe Zakona o ustanovama ("Službeni list RBiH", br. 6/92, 8/93 i 13/94), kao i odredbe zakona ili drugih osnivačkih akata kojim su osnovane ove institucije na nivou Bosne i Hercegovine.

Član 9.

(Stupanje na snagu)

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj 01-02-26538/24
26. aprila 2024. godine
Sarajevo

Predsjedavajući
Skupštine Kantona Sarajevo
Elvedin Okerić, s. r.